

WAOR GEBEURDJ....

Opper tied



Eine jong oet Haler, dae hieël duks Maurice waerdj ge-neumdj, zoog de datum nadere det hae 30 zoog waere. Omdat hae det ein gooje reden vonj om ein fieëstje te gaeve, versteurdje hae oetnuediginge per I-meel nao Jan en alleman. En zoea auch nao eemes oet Haler dae wae veur ut gemaak mer Rik zulle neume. Noe waas ut geval det oppe oetnuediging stong det ut fieëstje gehao-je zoog waere op 30 nov. Eederein kan op zien klump aanveule det det 30 november is, eine daag dae in 2013 op eine zaoterdig is gevalle. Dae Rik, dae zal waal noe-ats klump drage, dus dae haaj niks aan geveuldj. Daobie zal ut waarsjienlik auch nog waal zoea zeen det dae Rik

of gein vrunj en noeats fieëstjes haet, of ein kwaaj vrouw toes, want op eine rustige woons-dig aovendj, wie Maurice en Janneke gezellig oppe bank nao de tillevies loge te kieke ging dao de bel en stong Rik met ein fles wien oppe stoep.

"Proficiat Maurice, ich kom der eine pitse".

"Huh, noe, vanaovendj? Ut is noe 30 oktoeaber en neet 30 november, doe uulskuuk!"

Bedremmeld ging Rik heives en Maurice teruuk nao zien Janneke.

Eine maondj later is alles toch weer good gekome en haet Rik der waal mieër as eine gepitsj bieje Maurice.

Wae vanne redaksie haope waal det Rik hiejvan gelieërdj haet en hae neet op 4 fibberwari zich geit opstelle bieje Jos Mousset veur de deur en zich geit ergere det hae van Huub van Pinx-huuske gein burdje kriegt veur de optocht....

Borde



Der weidj jein nuje windj door Rabbedabbe-landj. De Raod van Ellef is bienao met ellef man en dus kinne der mieër sjouwers onger de organizaasie vanne Halerse Vastelaovendj waere gezatte.

De kunst geit den waere det eederein van ein en anger wetj wat der mot doen.

Zoea waerdj niks euver geslage en gein dinge dub-bel gedaon.

Sinds veurig jaor hubbe wae sjoean nuuj borde veur langs de durps-grens. Dao op staon de aktivi-teite en de datums woea-op det die aktiviteite plaats vinje.

Wae vanne redaksie zooge toet ooze sjrik det die borde al twee waeke inne grondj stonge, mer gein meljing van Prins oetroope en auch neet vanne Prinsereceptie en auch nog geine datum der op. Ein tillefontje nao Har lieërdje os det ut um waarsjienlik zoot in ut feit det Rik de datums mos oet zeuke. Mer nao det fieëstje van Maurice troewdje de Vastelaoves vereiniging ut neet mieër en haet toen toch met beslaote om nog ins te kontrollere of der den waal de gooje datums op die borde zooge kome te staon.



En twee waeke later is alles toch nog good gekome. En det is nog altied 4 waeke veur ut Prins oetroope en 10 waeke veur de Vastelaovendj.

Dus minse, asj gae met ut Prins oetroope anger minse neet zeetj omdat die der neet zeen, of missjiens aafwezig, of urges anges, den kan det neet ligge aan die borde of det der get later de datum op is geplektj.